

Poortuutissat pillugit nalunaarummi immiaaqqat aalakoornartortaqaangitsut eqqunneqartalernissaannut inerteqqutit Naalakkersuisunit atorunnaarsinneqarnissaannut Inatsisartut aalajangigassaattut siunnersuut, (Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaat nr. 16, 28. maj 2002-imeersoq), taannalu aqqutigalugu immiaaqqat aalakoornartortaqaangitsut eqqunneqarsinnaalerlutillu tuniniagaasinnaaleqqullugit.

(Inatsisartunut ilaasortaq Justus Hansen, Demokraatit)

Immiaaqqat imeruersaatillu kulsyrimik akullit puui pillugit Namminersornerullutik Oqartussat nalunaarutaata maanna atuuttup allanngortinneqarnissaa pillugu Naalakkersuisut pisussaaffilerneqarnissaannut Inatsisartut aalajangigassaattut siunnersuut, taanna aqqutigalugu immiaaqqat imeruersaatillu kulsyrimik akullit Kalaallit Nunaat tamakkerlugu qillertuusanut poorlugit tunisaasinnaaleqqullugit, qillertuusallu taakku aamma utertittaganngussasut.

(Inatsisartunut ilaasortaq Nivi Olsen, Demokraatit)

Akissuteqaat

(Naalakkersuisut Siulittaasuut)

Aappassaaneerneqarnera

Aalajangigassatut siunnersuutit marlussuit ataatsimoortillugit sammineqassammata, Naalakkersuisut ataasiinnarmik akissuteqaasiorput.

Inuutissarsiornermut Aatsitassanullu Ataatsimiititaliap sukumiisumik isumaliutissiissusiorsimaneranut Naalakkersuisut sinnerlugit qutsavigaakka, Naalakkersuisullu sinnerlugit nuannaarutigaaara ataatsimiititaliami ilaasortat isumaqatigiillutik imm. 58 akuerineqaqqullugu saqqummiuummassuk.

Imm. 181-ip siullermeerneqarnissaanut allannguutissatut siunnersuut Naalakkersuisut siunnersuutigisimavaat. Naalakkersuisut nuannaarutigalugu maluginiarpaat ataatsimiititaliami tamarmik isumaqatigiillutik allannguutissatut siunnersuutip akuerineqarnissaa innersuummassuk.

Taama naatsunik oqaaseqarlunga siunnersuut Inatsisartunit ingerlateqqinneqaqqullugu ingerlateqqippara.